

# «Si là giain nus!»

Per la seconda giada durant ses temp sco cusseglier guvernativ presidiescha Jon Domenic Parolini (AdC) quest onn la regenza grischuna. Il 2024 è in onn festiv: il Grischun vegg a festivar ils 500 onns dal Stadi liber da las Trais Lias. La FMR ha discurrì cun Jon Domenic Parolini davart ses onn presidial, davart ses diesch onns en la regenza e davart il Term Bel.

DAVID TRUTTMANN/FMR

Per il mument na vegg il cusseglier guvernativ Jon Domenic Parolini betg da far grondas turas cun skis. El ha feri a Nadal in schanugl tras in pitschen accident sin pista. E tuttina è Jon Domenic Parolini da bun anim per la partenza en quest onn presidial 2024.

**FMR:** Atgnamain pudessas Vus ir questa stad en pensiun, sin il 65avel anniversari. Quai fiss bain in patratg attractiv?

**Jon Domenic Parolini:** (ri) Pli baud aveva jau adina en testa il 2024 sco onn da mia pensiun. Ed ussa sun jau qua: frisch e saun, fitg motivà ed elegi per anc trais onns sco cusseglier guvernativ. Uschia che jau ma legrel da presidier quest onn la regenza ed jau fatsch ferm quint da lavurar anc sco regent enfin la fin da la legislatura dal 2026.

Quest onn 2024 essas Vus il dieschavel onn en uffizi sco cusseglier guvernativ. Tge ha midà durant quest decenni?

Jau hai pudi rimnar bleras bunas experientschas – forsa tranteren era da quelas main bunas. Ma jau hai pudi emprender bler, p.ex. co ch'il chantun e si'administraziun funcziunan. Aifer la regenza avain nus in fitg bun clima da laver. Ed era en il departament poss jau collavur cun blera glieud fitg motivada.

Però questi davos diesch onns è capità enorm bler: corona ha mess sin il chau il mintgadis, la midada dal clima s'accentuescha, la digitalisaziun avanza, las undas da fugitivos, la mancanza da personal... – Èl mund dal 2024 in auter che quel dal 2014?

Gea, igl è capità bler. Dal 2014 n'eran questas tematicas e crisas anc betg enco-nuschentas. Surtut han ussa las guerras actualas in'influenza directa u indirecta sin il Grischun, sco la situaziun da fugitivos. Ma jau pens che gisst noss chantun haja er emprais bler. Nus savain ussa co ch'igl è da reagir p.ex. cun catastrofes da la natira sco a Bondo u cun las mesiras da protecziun en connex cun la pandemia. Sco regenza avain nus durant corona savens stui decider fitg svet e cum-batter per noss interess, sco cun l'avertura da las pendicularas.

Datti en general pli savens in «stadi d'alarm», nua ch'igl è da reagir?

Quai pon ins schon dir. Gist durant la pandemia hai dà bleras sesidas urgentas, mintgatant era la dumengia. Jau ma regord anc dad ina dumengia sin ina tura da skis sin il Piz Champatsch en Val Tuoi. Durant ina pausa hai jau guardà sin il telefonin. E baincomal è vegni clamà ad ina sesida – il suenter-medzi stueva jau esser ora Cuira. Talas sesidas cun decisius urgentas hai dà pliras giadas. Ma entant è sa chapescha sa calmada la situaziun.

Vus avais passentà era muments main agreabels durant questi onns sco re-gent, cumbindas cun ina u l'autra notg senza sien: las renfatschas en connex cun il scandal da cartel, il 2018 essas Vus vegnids reelegids cun mo 31 vuschs avantatg, quatter ons pli tard avais Vus fatg la reelezioni cun bravura. Tge ha Jon Domenic Parolini emprais en questi onns?

Quai èn naturalmain stadas circumstan-zas fitg spezialas. Schegea che jau hai adina communità àvertament e transparentament, gis a partir dal 2014, avant mi'elezioni en la regenza. Ma causa ils rapports da medias dal 2018



I n'è betg ina fotomontascha – già il settembre 2023 ha la regenza grischuna fatg en globo ina spassegiada sin il Term Bel/Dreibündenstein per far là la fotografia uffiziala dal gremi dal 2024 (da san.): Carmelia Maissen, Marcus Caduff, Jon Domenic Parolini, Martin Büeler e Peter Peyer.

hai lura dà ina nova dinamica ch'ins na vegg betg pli d'influenzar. En talas si-tuaziuns resti da sperar d'avoir il sustegn da quella glieud ch'enconuscha bain las circumstanzas. Perquai sun jau fitg engraziaivel dad adina avoir gi in grond sustegn en la regium ch'enconuscha mai, mia laver ed era las circumstanzas en connex cun quest scandal. Il chantun Grischun ha intercurì da rudent tut la tematica, senza ch'ins avess pudi far ina reproscha enversa mai e mia laver. Perquai èsi ina gronda satisfaciun che jau sun vegni reelegì il 2022 cun 10 000 vuschs dapli che quatter onns avant.

**Voss emprim onn sco president da la regenza è stà il 2019, damai curt su-enter ch'il scandal da cartel ha procu-rà per lingias grassas. Gia mo la par-tenza en quest segund onn presidial vegn ad esser autra?**

Bun, la laver resta la medema – igl è da represchentar il Chantun e da manar las sesidas da la regenza. Ma naturalmain èsi ussa in bun sentiment ed jau giaud l'uffizi da president.

**Tge è stà u vegg ad esser l'emprim act uffizial sco president?**

L'emprim act uffizial è atgnamain stà in e-mail. Jau hai scrit ils giavischs da «bun onn» a tut las collauraturas e tut ils collauraturas da l'administraziun chan-tunala. Sa chapescha hai jau era rendi attent al giubileum che nus festivain quest onn, ils 500 onns dal Stadi liber da las Trais Lias. E proximamain ent-schaiva lura il WEF a Tavau, nua che jau hai era anc l'occasiun da tegnair in pled da bainvegni tar il Swiss Personalities Dinner.

**Il giubileum da 500 onns da las Trais Lias è damai in dals accents da Voss onn presidial. Tge po il Grischun dad oz atgnamain emprender da la reunio-n da l'onn 1524?**

Jau sparesch che blera glieud sa laschia sensibilisar danunder che nus vegn. Igli è schon impressiunant tge ch'è capità quels onns 1524/25. Las Trais Lias èn stadas fitg progressivas sco unitad de-mocratica e solidarica – ed igl è stà remartgabel ch'ins ha perfin surlaschà a las singulas vischnancas la decisiu-

fessiunala. Il Grischun è stà avantgardistic quella giada. Las regiuns èn s'unidas per far valair lur dretgs en ina regiun al-pina cun impurtanza strategica. Qui po seguir valair er oz sco exempl – da s'unir malgrà tuttas differenzas confesiunals, linguísticas e culturalas. A la fin è quell'unii stada in model da suc-cess, e da qui èsi seguir bun da's render conscient er oz.

**Quasi sco act simbolic avais Vus ra-bitschà l'entira regenza sin il Term Bel tranter Veulden e Brambrüesch – il crap da cunfin tranter las trois lias grischunas. Là avais Vus fatg la foto-grafia da la regenza da quest onn.**

Bain cler, quai è stada mi'idea. Jau hai ditg a mes collegas ed a mia collega: «Si là giain nus! Là faschain nua noss fotografa da la regenza per il 2024!» Già la stاد passada aveva jau fatg ina «reco» cun il velo sin il Term Bel. A la fin avain nus lura fatg il settember ensemen ina spassegiada da circa in'ura dal Culm Ault fin sin quella collina. Ina bellezza! E sa chapescha è il Term Bel in lieu sim-bolic per quest onn da giubileum.

**Turnain aval – en Voss departament, tar l'Uffizi da cultura datti midadas. La manadra da l'uffizi banduna il post. Ed apparentamain vegn l'uffizi**

**era reorganisà levamain. Cura vegg communità en chaussa?**

Barbara Gabrielli è en uffizi anc enfin la fin da fanadur da quest onn. Ella vegg er anc a preparar il segund concept da promozion da cultura che duai entrar en vigor dal 2025. Sia successiun vegg la regenza lura ad eleger previsiblamente en il decurs dal faver u mars. Concer-nent la reorganisaziun datti ina midada en quel senn che la promozion da cul-tura n'è betg pli suttamessa directamain a la manadra d'uffizi, mabain furma in'atgna partiziun, manada ussa dad Andrea Conrad che enconuscha, sco substituta d'enfin qua tar quella parti-zion, già fitg bain la promozion da cul-tura en il Grischun.

**En tavla stat proximamain tar Voss departament era la revisiun da la le-scha da la scola populara. In punct im-purtant è da valurisar la scoletta e d'augmentar las pajas da las mussa-dras e dals musaders.**

Gea, quai è correct. Ed igl è in pass ne-cessari, perquai che nus stuain auzar las pajas en cumpareglaziun cun las pajas en ils chantuns vischins da la Svizra orientala. Ma nus stuain era far adattaziuns tar las pajas en general en la scola populara. Dasperas cumpiglia

la revisiun però er anc auters puncts impurtants, sco la dumonda da l'integraziun resp. la separaziun, la scola d'ospital ed auter pli.

**Giain puspè en muntagna: Vus fa-schais gugent turas da skis en munto-gna. Ma per il moment avais dad ir per part cun crutschas?**

Gea, jau hai giudi dad ir cun skis du-rant ils dis da Nadal. Ma deplorabla-mai hai jau fatg in pitschen accident sin la pista che va enfin giu la val. Ed ussa èsi da schanegiar il schanugl sane-ster, però i va era senza crutschas.

**Tuttina pudais seguir dar in tip presidi-al: Sin tgenin piz èsi dad esser stà sco bun/a Grischun/a? Sin il Term Bel?**

Cler, il Term Bel è in bel lieu. Ma i dat anc blers auters blets puncts en il Gri-schun. Jau sun naturalmain il pli savens en gir en Engiadina Bassa. Ina bella gita pon ins far al sid da Tarasp, en la Val Zuort, sin il vadret sisum la val e lura ir fin sin il Piz Zuort. Avant dus onns avain nus gi sin quella tura relaziuns fascinantias, cun ina pulvra da bellezza. Ma i dess anc blerischmas autres gitas ch'ins pudess cusseglier. Vulain sperar che avant la fin da la stagion d'enviern saja la ferida al schanugl puspè guardia!



Jon Domenic Parolini (AdC) è ussa il dieschavel onn en la regenza grischuna. Già il 2019 aveva el presidià il gremi.

## Per la seconda giada president

Il cusseglier guvernativ Jon Domenic Parolini (64) da Scuol/Cuira è vegni elegì il 14 da zercladur 2023 a Clau-stro (sessiun extra muros) sco presi-dent da la regenza grischuna per l'onn 2024. L'anteriori inschigner forestal, capo da Scuol e deputà era vegni ele-gì il 18 da mag 2014 sco cusseglier guvernativ. Ils emprims quatter onns era el stà parsura dal Departament d'economia publica e fatgs socials. Dapi il 2019 è el il regent responsabel per il Departament d'educaziun, cultu-ra e protecziun da l'ambient. Già durant l'onn 2019 aveva Jon Domenic Parolini presidià ina emprima giada la regenza grischuna. (fmr/dat)